

**Lov for Kaupanger Idrettslag skipa 04.juni 1935.
Vedteken den 18. januar 1936 med seinare endringar seinast av 20. februar 2007.
Godkjend av Idrettsstyret 2007**

§ 1 Føremål

Idrettslaget sitt føremål er å drive idrett organisert i Norges Idrettsforbund og Olympiske Komité (NIF).

Arbeidet skal pregast av frivilligheit, demokrati, lojalitet og likeverd. All idrettsleg aktivitet skal byggje på grunnverdiar som idrettsglede, fellesskap, helse og ærlegdom.

§ 2 Organisasjon

Idrettslaget er medlem av NIF gjennom Sogn og Fjordane idrettskrets.
Idrettslaget er medlem av dei særforbunda som laget sitt årsmøte bestemmer.
Idrettslaget høyrer heime i Sogndal kommune, og er medlem av Sogndal idrettsråd.
Idrettslaget er sjølvveigande og frittstående med utelukkande personlege medlemer.

Reglane i NIF-lova kapittel 1, 2, 10 11, 12, 13 og 14 gjeld for idrettslaget uavhengig av kva som måtte stå i idrettslaget si eiga lov.

§ 3 Medlemer

Alle som aksepterer idrettslaget og overordna idrettsorgan sine lover og vedtekter kan bli teken opp som medlem. Idrettslaget har rett til å avslå ein søknad om medlemskap i heilt spesielle tilfelle. I tilfelle tvist avgjer idrettskretsen om søkjaren kan takast opp. Kretsen si avgjerd kan ankast til Idrettsstyret innan 14 dagar etter at rekommandert melding er sendt til dei partane saka gjeld.

Alle som er medlem følgje lovene til NIF, andre organisasjonsledd og idrettslaget sine eigne lover og vedtekter.

Ein søkjar kan ikkje bli medlem utan at økonomiske plikter til andre organisasjonsledd i NIF er gjort opp.

Medlemskap i laget er først gyldig og vert rekna frå den dag første kontingent er betalt.

§ 4 Medlemskontingent og avgifter

Medlemskontingenten vert fastsett av årsmøtet og skal betalast på forskot.

Andre avgifter/eigendelar kan krevjast for deltaking i aktivitetstilboda i laget.

Medlem som skuldar kontingent for meir enn eitt år i høve den betalingsfristen som styret har sett ved utsending av kontingentkravet, kan av styret strykast som medlem i idrettslaget. Dersom medlemmen, ved forfall, skuldar kontingent for 2 år, skal medlemskapen avsluttast ved stryking frå idrettslaget si side ved vedtak om kontingent for nytt driftsår. Når ein medlem vert strøken, kan vedkomande ikkje takast opp att før skuldig kontingent er betalt.

§ 5 Kven har stemmerett og kven kan veljast

For å ha stemmerett må ein medlem vere fylt 15 år, og hatt gyldig medlemskap i minst 1 månad og ha oppfylt medlemskrava, jf. NIF-lova § 2-5. Ingen kan møte eller stemme ved fullmakt, jf. NIF-lova § 2-9.

Alle medlemmer som har stemmerett kan veljast til tillitsverv i laget, og som representant til ting eller møte i overordna organisasjonsledd. Ein tillitsvald kan derimot ikkje samtidig vere arbeidstakar i laget. Spelar/utøvar med kontrakt og medlemskap i laget kan like fullt veljast som representant til ting eller møte i overordna organisasjonsledd.

Medlemmer som skuldar kontingent har ikkje stemmerett, kan ikkje veljast og kan ikkje vere representant til ting eller møte i overordna organisasjonsledd.

§ 6 Godtgjersle til tillitsvalde

For refusjon av utgifter og godtgjersle til idrettslaget sine tillitsvalde gjeld: Tillitsvald kan få refusjon for nødvendige, faktiske utgifter, inkludert tapt arbeidsforteneste som vedkomande vert påført i utføringa av vervet. Tillitsvald kan ta i mot ei rimeleg godtgjersle for arbeidet sitt. Utgifter til tapt arbeidsforteneste og til godtgjersle skal gå fram av budsjett og rekneskap.

§ 7 Inhabilitet

Tillitsvalde, oppnemnde representantar og tilsette er inhabile til å leggje grunnlaget for ei avgjerd eller til å treffe avgjerda:

- a) når vedkomande sjølv er part i saka
- b) når vedkomande er i slekt eller svogerskap med ein part i oppstigande eller nedstigande linje eller i sidelinje så nær som søsken
- c) når vedkomande er gift med eller er forlova eller sambuar med ein part
- d) når vedkomande er leiar for eller har leiande stilling i eller er medlem av styret i eit selskap som er part i saka.

Sameleis er tillitsvalde, oppnemnde representantar og tilsette inhabile når andre særeigne tilhøve ligg føre som kan svekke tilliten til om vedkomande er upartisk, mellom anna skal det leggjast vekt på om avgjerda i saka kan gi særleg fordel, tap eller ulempe for vedkomande sjølv eller nokon som vedkomande har nær personleg tilknytning til. Det skal også leggjast vekt på om inhabilitetsmotsegn er reist av nokon part.

Inhabilitetsreglane skal ikkje brukast dersom det er innlysande at den tillitsvalde eller tilsette si tilknytning til saka eller partane ikkje vil kunne påverke vedkomande sine standpunkt og at idrettslege interesser ikkje tilseier at vedkomande bør vike sete.

Er ein overordna inhabil, kan avgjerd i saka heller ikkje treffast av direkte underordna i det same organisasjonsleddet.

Med part vert det her meint tillitsvalde, oppnemnde representantar og tilsette som ei avgjerd rettar seg mot eller som saka elles direkte gjeld.

§ 8 Straffesaker

For alle straffesaker gjeld NIF-lova kapittel 11 og 12 (NIF sine straffevedtekter).

§ 9 Årsmøtet

Idrettslaget sitt øvste organ er årsmøtet som vert halde kvart år i månadsskiftet februar / mars.

Styret kallar inn til årsmøte minst ein månad på førehand. Dette skjer ved kunngjering i pressa og på idrettslaget si heimeside. Forslag som skal handsamast på årsmøtet må vere sendt til styret seinast 2 veker før årsmøtet. Fullstendig sakliste og andre nødvendige saksdokument med forslag må vere tilgjengeleg for medlemene seinast ei veke før årsmøtet.

Alle medlemene i idrettslaget har tilgjenge til årsmøtet. Årsmøtet kan invitere andre personar og/eller media til å vere til stades, eventuelt vedta at årsmøtet berre er ope for medlemmer.

Lovleg innkalla årsmøte er vedtaksført dersom det møter eit tal medlemmer som minst svarar til talet på styremedlemmer. Dersom årsmøtet ikkje er vedtaksført, kan det innkallast til årsmøte på nytt utan krav om minimumsdeltaking.

På årsmøtet kan det ikkje handsamast forslag om lovending som ikkje er oppført på utsend/kunngjord sakliste. Andre saker kan handsamast når 2/3 av dei med stemmerett på årsmøtet vedtek det, ved godkjenning av saklista.

§ 10 Leiing av årsmøtet

Årsmøtet vert leia av vald(e) dirigent(ar). Dirigenten/-ane treng ikkje vere medlem av idrettslaget.

§ 11 Årsmøtet sine oppgåver

Årsmøtet skal:

1. Godkjenne dei som har stemmerett
2. Godkjenne innkallinga, saklista og møtereglane
3. Velje dirigent, sekretær og 2 representantar til å skrive under protokollen
4. Handsame idrettslaget si årsmelding, irekna eventuelle gruppeårsmeldingar
5. Handsame idrettslaget sin rekneskap i revidert stand
6. Handsame innkomne forslag og saker
7. Fastsetje medlemskontingenten
8. Vedta idrettslaget sitt budsjett herunder rekneskap og budsjett for dei ulike undergruppene.
9. Handsame idrettslaget sin organisasjonsplan. Organisasjonsplanen skal regulere den interne organiseringa i idrettslaget, og innehalde oversyn over tillitsvalde i tillegg til styret og dei andre lovfesta tillitsverva.
10. Gjere følgjande val:
 - a) Leiar og nestleiar
 - b) 1 Styremedlem per undergruppe i laget
 - c) Andre val i høve til årsmøtevedteken organisasjonsplan, jf. § 11 pkt. 9
 - d) 2 revisorar
 - e) Valkomité med leiar og 2 medlemmer for neste årsmøte

Leiar og nestleiar skal veljast enkeltvis. Dei andre medlemene til styret skal veljast samla. Deretter vert varamedlemene valde samla, og ved skriftleg val vert rekkjefølgja avgjord i høve til stemmetala.

Medlemmer til hovudstyret og undergrupper vert vald for ein periode på 2 år. Ved første gongs val vert halvparten av medlemmen vald for ei periode på eitt år.

Ved vala skal det veljast kandidatar/representantar frå begge kjønn. Samansetjinga skal vere høvesvis i samsvar med kjønnsfordelinga i medlemsmassen i idrettslaget, men likevel slik at det

skal vere minst to representantar frå kvart kjønn. I grupper, råd og utval m.m. som har 2 eller 3 medlemmer skal begge kjønn vere representert.

Vala skjer i samsvar med NIF-lova § 2-11.

Dersom saklista ikkje kan fullførast, skal det innkallast til framhaldande årsmøte. Slik innkalling skjer på tilsvarende måte som for ordinært årsmøte, men med kortare frist godkjend av årsmøtet. Framhaldande årsmøte kan berre handsame saker som var med i godkjend sakliste for årsmøtet.

§ 12 Stemmegjeving på årsmøtet

Med mindre anna er lovfesta skal eit vedtak for å vere gyldig ha fått vanleg fleirtal av dei avgjevne stemmene.

Val skjer skriftleg dersom det ligg føre meir enn eitt forslag eller det vert fremja krav om det.

Dersom det skal vere skriftlege val, kan det berre førast opp kandidatar som det er gjort forslag om på stemmesetelen. Stemmesetlar som er blanke, eller som inneheld kandidatar som det ikkje var forslag om, eller som ikkje har det talet det skal stemmast over, tel ikkje, og stemmene vert rekna som ikkje avgjevne.

Når eit val skjer enkeltvis og ein kandidat ikkje får meir enn halvparten av dei avgjevne stemmene, skal det haldast omval mellom dei to kandidatane som har fått flest stemmer. Er det ved omval stemmelikskap, vert valet avgjort ved loddtrekning.

Når det ved val skal veljast fleire ved ei avstemming, må alle, for å verte valde, ha meir enn halvparten av dei avgjevne stemmene. Dette gjeld ikkje ved val av varamedlemer. Dersom ikkje mange nok kandidatar har oppnådd dette i første omgang, vert dei valde som har fått meir enn halvparten av stemmene. Det vert så halde bunde omval mellom dei andre kandidatane, og etter denne avstemminga er dei valde som har fått flest stemmer. Er det ved omval stemmelikskap, vert valet avgjort ved loddtrekning.

§ 13 Ekstraordinært årsmøte i idrettslaget

Ekstraordinært årsmøte i idrettslaget vert innkalla av idrettslaget sitt styre minst 14 dagar på førehand etter:

- a) Vedtak på årsmøte i idrettslaget
- b) Vedtak i styret i idrettslaget
- c) Skriftleg krav frå 1/3 av medlemene i idrettslaget
- d) Krav etter vedtak i overordna organisasjonsledd: NIF eller idrettskrets.

Ekstraordinært årsmøte i idrettslaget skal berre handsame dei sakene som er med i vedtaket eller i kravet om innkalling av årsmøtet.

§ 14 Idrettslaget sitt styre

Idrettslaget vert leia og forplikta av styret, som er idrettslaget sitt høgste organ mellom årsmøta.

Styret skal:

1. Iverksetje årsmøtet og overordna idrettsstyresmakter sine vedtak og avgjersler
2. Syte for idrettslaget sin administrasjon og føre nødvendig kontroll med den totale økonomien i laget i samsvar med NIF sine rekneskaps- og revisjonsvedtekter.
3. Etter behov oppnemne komitéar/utval/personar for spesielle oppgåver og utarbeide mandat/instruks for desse
4. Representere idrettslaget utetter

Styret skal halde møte når leiaren bestemmer det eller eit fleirtal av styremedlemene krev det.

Styret er vedtaksført når eit fleirtal av medlemene i styret er til stades. Vedtak vert gjort med fleirtal av dei avgjevne stemmene. Ved stemmelikskap er møteleiaren si stemme avgjerande.

§ 15 Grupper/avdelingar/komitéar

Idrettslaget skal ha valkomité som skal veljast på fritt grunnlag på årsmøtet i idrettslaget, etter innstilling frå styret, og har som oppdrag å leggje fram innstilling på kandidatar til alle andre tillitsverv som skal veljast på årsmøtet.

Laget vert organiserast med grupper. Årsmøtet i laget gjer vedtak om skiping av grupper, og korleis desse skal organiserast og leiast. Dette vert vedteke i samband med årleg handsaming av idrettslaget sin organisasjonsplan, jf. § 11 pkt. 9.

Heile laget heftar for gruppene sine økonomiske plikter og ansvar, og gruppene kan ikkje gjere avtaler eller representere idrettslaget utetter utan godkjenning frå styret. Det er berre idrettslaget sitt hovudstyre eller den som hovudstyret gjev skriftleg fullmakt til som kan gjere tilsetjingar, inngå sponsoravtalar, eller inngå andre avtalar som bind idrettslaget reint juridisk/økonomisk. Ved tilsetjingar må dette forankrast på årsmøtet eller ekstraordinært årsmøte, under punkt 9

§ 16 Lovendring

Lovendring kan etter NIF-lova § 2-15, 2. ledd, berre gjerast på ordinært eller ekstraordinært årsmøte i idrettslaget etter å ha vore oppført på saklista, og krev 2/3 fleirtal av dei avgjevne stemmene.

Lovendringar må godkjennast av Idrettsstyret, og trer ikkje i kraft før dei er godkjende.

Idrettsstyret kan i samband med godkjenning av lovene til underliggjande organisasjonsledd redigere desse slik at dei ikkje kjem i motstrid med vedtektene i NIF-lova.

Lovendringar gjort av Idrettstinget, som har konsekvensar for idrettslaget, trer i kraft straks.

§ 17 Oppløysing

Oppløysing av idrettslaget kan berre, etter NIF-lova § 2-16, handsamast på ordinært årsmøte. Vert oppløysing vedteke med minst 2/3 fleirtal, skal det innkallast til ekstraordinært årsmøte 3 månader seinare. For at oppløysing skal skje, må vedtaket også her gjerast med 2/3 fleirtal.

Samanslåing med andre lag vert ikkje rekna som oppløysing av laget. Ved samanslåing skal eldste skipingsdato og klubbnummer for dette idrettslaget brukast. Vedtak om samanslåing og nødvendige lovendringar i samband med dette skal gjerast i samsvar med vedtektene om lovendring, jf. § 16.

I tilfelle oppløysing eller anna avbrot av laget tilfell laget sine eignelutar NIF eller føremål godkjent av Idrettsstyret.

I fall oppløysing skal laget sitt arkiv sendast til idrettskrinsen.

Ved konkurs vert organisasjonsleddet rekna som oppløyst og misser såleis medlemskapen i NIF. Ved konkurs gjeld reglane i konkurslova og dekningslova.